

La geja, n ben comun aministrà da la jent

L professor Emanuele Curzel à fat n enteressant aprofondiment sui documenc storics de l'archivie de la geja de Dèlba

Dèlba - Argoment zentrèl del secont apuntamento de la rassegna "Ispirazioni d'istà 2010" endrezèda da la Comiscion per la cultura, l'ecumenism e l dialogh interreligios del Decanat de Fascia en colaborazion co l'Apt de Fascia e i Comitac manifestazions di desvalives païjes, l'é stat l liber "Le pergamene dell'archivio di Alba (1410-1772)" metù ensema dai professores Cesare Bernard e Guntram Plangg su la documentazion storica regoeta da Pare Frumenzio Ghetta de Martin, dat fora da l'Istitut cultural

ladin.

Te geja de Sènt Antone l professor Emanuele Curzel, enrescior de storia medieva a l'Università de Trent e espert de storia de la Geja (aessa cognù tor pèr ence l professor Gian Maria Varanini, ma per problemes a l'auto no l'ha podù ruèr fin ta Dèlba), à fat n aprofondiment n muie enteressant sul tem "costruire il sacro". Aprofondiment che à menà l publich dò n troi che taca ite da dalonc, apontin tel '400.

Fèr sù, edificà la gejes... co éles nasciudes la pruma cèses de cult de nesc païjes?

"Anter la fin de l'Età de Mez e l scomenz de l'età moderna vegn fat na revolucion pastorèla: – à dit Curzel – l numer de la gejes se smaora (dant l'era demò la Pieif olache vegnìa dit messa e dat fora i sacramenc), e coscita ence l numer de preves.

Ma chi él pa che à fat chesta revolucion pastorèla? No de segur la geja desche gerarchia e nience vèlch autorità politica. L'é stat la volontà di laiches che se à arvejinà ai dogmes ecclesiastiches e "vel viver da cristiegn". De chesta vita da cristiegn che dèsc segurezza, identità e degnità, fèsc pèr la prezenza de na geja te païsc, e no più dalonc junsom la val, desche tel cajo de Dèlba. Co la geja vegn

metù ensema ence na dota che serf per paèr n preve enciarià de zebrèr n cert numer de messes te païsc. L'é donca i laiches che se cruzia, tant de la gestion di bens, che del raport col preve. Adertura te la bergamines troèdes te geja de Dèlba se lec che "del 1623 i laiches ge domanèa al preve de "portarsi da religioso".

Ence la geja l'é n ben comun e desche ben comun l vegn gestì da n aministrador che sà che l cogn aministrèr no per si enteresc ma per chi che vif te païsc.

Ben comun, n conzet che te chesit ultim temp se à ciarià de significat e de valuta. N conzet palesà a na vida prezisa dai veiores documenc storics de l'archif de Dèlba: duc aea oblighes con duc, na sort de relacions con n significat economich che jia sorafora i scioldi e l marcià: l don e la spartijon, la robaries e la ladraries, l vot e l sfrelaus... dut podea creèr formes de leam e de obligazion.

"Fondamentèl l'era l conzet de reciprocità – à spiegà amò Curzel. Te la vita de la comunanzes chesit enteress utilitarie l vegnìa palesà ence travers la regolamentazion de la gestion di bens comuns (bosé, pèscoi). No l'era na ideologia de la comunanza: l'era enteresc comuns che leà chi che vivea te




I professores Cesare Bernard e Emanuele Curzel te geja de Dèlba à rejonà de "costruire il sacro".

chi mèjes, te chi lesc, l'era l resultat de n lonch prozess storich." N prozess storich che aea reijes fones delaite de la comunanza de Fascia, tout sù e spartì dai sentadins che no se sparagnèa tel se didèr l'un co l'auter. L mond é mudà debel, i raporc anter la jent se à adatà a la vita daldidanché. Fosc ence la vida che nos aldidanché lejon chi veiores documenc no la é medema a coche i vegnìa scric e lec del '400. Ma l conzet de comunanza e l prinzip del ben comun, se sà ben atualisà e proporzionà a nesc tempes, cognessa restèr la maor ispirazion e vida del nef Comun General de Fascia.

L professor Emanuele Curzel à dapò fenì fora so intervent portan dant al publich vèlch pont de reflescion. "La revolucion pastorèla partegn al passà, ma la ne met tedant domanes amò atuèles: l davegnir de la Geja passel amò per la prezenza sul teritorie? Se scì, co pa? Olà se troel l'identità comunitèra, de coluns sìmbol èla de besegn? Colun él l raport anter fe, identità e comunanza? Domanes che podarà en pèr troèr risposta ti desvalives apuntamenc che la rassegna "Ispirazioni d'istà 2010" met dant via per chisc meisc.

Monica Cigolla



La soracuerta del liber su la storia de la geja de Dèlba.